

DANIEL,

SEU

VERUS DEI CULTUS

IN ORIENTE RESTITUTUS.

TRAGOEEDIA

ACTA

LUDIS SOLENNIBUS

ANNI MDCCI.

IN REGIO

LUDOVICI MAGNI COLLEGIO

Societatis JESU.

Auctore P. GABRIELE FRANCISCO LE JAY
ex eadem Societate.





PARISIIS,


Apud JOANNEM MARIETTE Bibliopolam, viâ
Jacobæâ, ad insigne Columnarum Herculis.

M. DCCIII. +

CUM PERMISSU.







ILLUSTRISSIMO VIRO
 JOSEPHO
 JOAN. BAP. FLEURIAU
 D'ARMENONVILLE,
 ÆRARIi GALLICI
 MODERATORI.



*NON est hoc virtutis fa-
 tum, etiam debitis hono-
 ribus cum fulget, VIR
 ILLUSTRISSIME; ut placere
 semper, & rapere omnium animos
 possit in amorem sui. Id ipsum su-*

* ij

EPISTOLA.

tis expertus periculo suo est celebris ille Daniel, qui prodit hodie in publicum, et tui nominis in umbra lucem affectat.

Erat in eo felix ille rarusque virtutum omnium comitatus, quæ magnos viros et rebus maximis destinatos commendare solent; summa vis ingenii, singularis prudentia, mira quedam in administrandis ingentis Imperii rationibus dexteritas, spectatae integritatis fama, sincerum Religionis studium. Neque in tanto rei feliciter gerenda præsidio, vel exerenda locus industriæ, vel potentissimi Regis amoris gratia defuerant. Tamen, quod mirum est, non potuit Daniel multorum invidiam criminationemque declinare; neque illam, quam meruerat apud omnes obiri sancte ac sapienter mu-

EPISTOLA.

neris, post exactum proVectioris vitæ cursum, laudem adipisci.

*Hinc vero quam lata tibi gratulandi seges exsurgit, VIR ILLUSTRIS-
SIME, qui in ipso maturioris ætatis aditu ad tantum dignitatis apicem eveetus, cum nullam ex illis dotibus, quas olim in Daniele Assyria tota suspexit, quisquam in te desideret; id etiam jamdiu sis affecutus, ut omnium admiratione pariter & amore perfruaris.*

Quæquam ne quis putet, unum hoc esse blandientis fortune munus, quod imis æque ac summis gratus & acceptus vivas. Fruetus hic candoris tui, comitatis, acerrimi pariter æquissimique judicii, & propensissimæ in unumquemque voluntatis; quibus sic demereris animos, ut te rerum suarum cogni torem omnes

EPISTOLA.

ambiant; nemo tristis à te, aut tibi non obligatus, etiam cum spe frustratus est sua, recedat.

*Gaude longum tuo illo tam singulari bono, VIR ILLUSTRIS-
SIME, dum tibi certam paternæ
virtutis in spem filius adolescit. De
quo si tam honorifice jam tum unus-
quisque prædicat, ut te hac beatum
prole non dubitet profiteri: Ego
qui sum inter ceteros, præstantissimæ
ipsius indolis, felicitis ingenii, &
maturi supra ætatem judicii propior
testis & admirator; patere, ut im-
pensis tibi gratuler; & hanc, quam
sors obtulit, significandæ meæ erga
te voluntatis occasionem arripiam.*

VIR ILLUSTRIS-
SIME,

Tibi addictissimus, GABRIEL
FRANCISCUS LE JAY,
è Societate JESU.



PRÆFATIO.

TAM benevole, tam humaniter, quæ de Josepho tria Dramata non ita pridem dedimus, excepta sunt; opinor, quia suum divinis Litteris argumentum debent; ut novam hanc, quæ Daniel inscribitur, Tragœdiam ex sacris codicibus pariter depromptam in lucem prodire paulo confidentius patiamur.

Enim vero jam assuescunt animi magnis ex se se ejusmodi spectaculis: maxime dum primariæ nobilitatis homines, ipsique adeo Principes, consecratas sanctarum

PRÆFATIO.

paginarum religione personas agere media in aula, nihil ab amplitudine suæ conditionis alienum putant. Utinam tam pia consuetudo poëtas illos dedoceret, qui nihil Theatro dignum arbitrantur, nisi quod inverecundum est, & Christianis moribus oppositum!

Non fuit quidquam tota retro antiquitate solenne aut gloriosum magis religioni veri Numinis, quam Decretum illud quod Darius Medus, procurante Daniele edidit; vi cuius in Oriente cultus Dei, quem soli pene Judæi agnoscerent, imperabatur.

Hinc illius Edicti memor Cyrus, qui Dario deinceps successit, & Persarum Imperium conjunxit cum Babylonico, captivos jam-

PRÆFATIO.

diu Judæos in libertatem vindicavit ; eisdemque demum remissis in Patriam , Hierosolymitanam Urbem , ipsumque in ea Templum ut repararent permisit.

Hujus porro sancienti Decreti occasio sufficit Tragicæ nostræ argumentum ; quod , uti jacet in libro Danielis , ita nulla sui parte immutatum descripsimus.


Darius Babyloniorum Rex unum è Principibus Regni sui Satrapis Danielem Judæum constituerat, eumque Imperio toti præficere supremum moderatorem cogitabat ; quod ceteros omnes sapientia longe superaret. Hinc Danielis odio incensi Satrapæ & in ejusdem exitium conjuratilegem Dario surripuerunt, qua, ne per dies triginta cuiquam Numi-

PRÆFATIO.

ni, nisi Dario ipsi, precatio fieret, prohiberetur. Posthabito tali Edicto, Daniel solitis Deum precibus non destitit palam obsecrare. Quare violatæ legis apud Darium à Satrapis accusatus, renitente nequidquam Rege, ad Leones damnatur. Unde cum evasisset incolumis, cultum veri Numinis per totum Imperium Edicto solenni procuravit; Rege in Satrapas eandem pœnam decernente.







A C T O R E S.

DARIUS Rex Babylonis.

ASTYAGES Darii Filius.

DANIEL.

GAZABÁR {
MITHRIDATES { Principes Satraparum;

PHRAORTES Præfectus domus regiæ.

JOSEDECUS Danieli intimus.

MILITES.

SCENA

BABYLONE IN PALATIO DARIÏ



ACTUS PRIMUS.

SCENA PRIMA.

DANIEL, JOSEDECUS.

JOSEDECUS.

NAM quis, vel unde pertinax vultu sedet,
Frontemque, solitum præter, obnubit
dolor :

Dum læta rident fata, dum placidos dies
Manifestus ultro Principis spondet favor ?
Quid deinde felix ambiat Daniel prece ?
Frustra nocendi livor injustus bonis
Exstimulet iras ; Rege mox uno minor,
Vitæque dominus pariter ac mortis potens
Injuriosas inde ridebis minas.

A.

DANIEL.

Id quæris? in me lata lex: nostrum in caput
Fulmen paratum.

JOSEDECUS.

Nempe tam infensus putas
Darius ut sit? hos tibi nectat dolos;
Titulos inanes, fragile dum impertit decus?

DANIEL.

Ah! parce: fraudis ne malæ regem arguas,
Neve execrandæ legis artificem increpes.
Hanc ipse vel si tulerit, imprudens tamen,
Mihî crede, nec quid faceret attentus, tulit.
At gens iniqua, Satrapæ & nostrum genus
Exosa, tales jam diu insidias struit;
Et vetera quærunt odia vindictæ locum.
Ille, ille, quo me cernis evectum, gradus
Incendit animos: extero natum in solo
Nec vana superum monstra metuentem piget
Dominum vereri. Reliqua quid frustra morer
Vesanus unde livor, & virus malum.
Crevere: Beli sacra ritusque impios
Palam revici fraudis; hinc dolet, hinc furit
Cultus profani tutor, & semper novas,

Cupidus nocendi Gazabar quærit vias.
 Hinc Mithridatis pariter ambitio impotens
 Sperare melius cœpit, & mihi dum timet
 Subesse, quem nec ferre potuisset parem,
 Statuit nocentem reddere, ut perdat reum.
 Ne dubita, amice: paribus utrinque æmulis
 Certatur; & quem vincere injustus furor
 Nequeat aperto Marte, jam oppugnat dolo.

JOSEDECUS.

Te nota Regis gratia & certus favor,
 Quid quid minetur hostis, incolumem dabunt.

DANIEL.

Erras, Amice; namque, res quo sunt loco,
 Haud me Darius ipse, si saluum velit,
 Eripere letho valeat. Hæc Persis sedet,
 Medisque regni dura lex; fixum & ratum
 Ut esse soleat, Satrapis quid quid semel
 Regique placuit.

JOSEDECUS.

Quid Deo occultum vetat
 Cultum exhibere, publicum quando haud licet?

DANIEL.

Tam turpe facinus, dedecus tantum feram,

Ignavus, excors? Non retro, ut possim, pedem
Velim referre; nec queam, si fors velim.

Peracta res est: omnibus feci palam,

Quis esse deceat legis injustæ metus.

Nosterve si quos animus etiamnum lætet;

Mox sacra precibus hora spectatum dabit.

JOSEDECUS.

Quæ te in pericla mittis? Atenim Rex
subit:

Salubriora, spero, consilia ingeret.

S C E N A S E C U N D A,

D A R I U S, D A N I E L.

D A R I U S.

Accede, nostri columnen & regni decus;
Generose Daniel; merita te pridem in-
clyta

Rerumque prudens animus, & constans fides

Superis & imis pariter acceptum caput

Fecere.

D A N I E L.

Proh! me forte felicem mea,

Cupidum obsequendi si modo studium appro-
bas,

Rex magne : quidvis aliud ulterius jube ;
Non me videbit ulla degenerem dies.

D A R I U S.

Age ergo : rebus strenuam Assyrius opem
Si quando ferre contigit , rerum juvat
Nunc demum habenas capere moderandas
manu

Te Satraparum tota gens deinceps colet
Uno minorem Rege , & ad nutum obsequens
Mandata peraget ?

D A N I E L.

Scilicet , dum me impias
Furtim per artes damnat infontem neci ;
Suique te te sceleris artificem facit ?

D A R I U S.

In me vel in te perfidi tantum audeant ?
Quid quereris ? ecquod , fare , conceptum est
nefas ?

D A N I E L.

Non me Leonum , magne Rex , sævus furor
Timidumve mortis aliud exterret genus.

A iiij

Propone flammæ, vulnera, & diras mali
Doloris artes; quidquid immane, horridum,
Quidquid cruentum livor atque odium im-
potens

Extuderit usquam; non ego impatiens querar.
Nec dura verear fata constanter pati.

At cur in ipsum gens mala insurgit polum,
Suum & supremo Numini eripiat decus?

D A R I U S.

Nam quo ista tendunt? Quem Deo ereptum
doles

Amice, cultum? Quisquis admisit scelus,
Per sceptrâ juro, vindicem agnoscet manum.

D A N I E L.

Etiamne legis impiæ auctores latent,
Quam regio ipse calculo, imprudens licet,
Palam approbasti? Mollibus sed enim dolis
Fecere fucum Satrapæ; & dum te unicum
Babylone Numen supplici agnoscunt prece,
Tam blandus error haud reluctantem abstulit.

D A R I U S.

Ah! video: miserum laudis illudit fames;
Suisque, quod suadebat, illecebris nefas

Obduxit. Utinam liceat ! infectum foret ,

Quodcumque feci.

DANIEL.

Sed age : quis nostrum interim ,

Tua si valebunt iussa , terdenos dies

Merito supremum Numen obsequio colat ?

Tu vota populi nempe , tu solus preces ,

Deus ipse regum dominus , & rerum arbiter ,

Quascumque terris cernimus , nullas feret ?

Et inultus ut sit ? Spretus, illus, probri

Impune patiens, scelere pro tanto , pares

Repetere pœnas parcat ? Ergone excidit ,

Nulloſve nuper vindicem expertus Deum

Abominandus Baltasar fecit metus ?

Hic pocula inter media, scortorum & greges,

Contaminare vasa nil veritus sacra,

Subita exaratum vidit attonitus manu,

Quod imminebat, debitum pœnæ genus.

Et ille prole melior , ast olim & Dei

Suique pariter immemor , folio excidit ,

Septem & per annos inter agrestes feras ,

Brutæque ritu pecudis exfatians famem

Nabuchodonosor , triste documentum dedit

Quantus superbos atterat Reges Deus!

D A R I U S.

Confide , Daniel , melius : hunc ipsum polo
Terrisque Dominum , quem colis , testor
Deum ;

Suus hunc honos & cultus illæsus manet :
Nec illa tibi lex , quam tuli , damnum afferet ;
Unum hoc precanti cede : tantisper preces
Omitte solitas : per brevem unius moram
Permitte lucis

D A N I E L.

Tam tibi notus parum est
Daniel ? Ut ævi fragilis indigno rear
Redimenda scelere tempora ? ah ! potius vide,
Quid mancipata Numini poscat fides ?
Simulare nam quid plura nequidquam velim ,
Quæ nota Satrapæ protinus facient palam ,
Vel me tacente. Disce quod verum est : Deus
Dum nostra repetit vota , parendum fuit ,
Nulloque potuit esse decretum loco,
Quodcumque faceres : quam voles pœnam
irroga,
Rex magne : sed me rursus ad solitas preces ,

Præfixa revocat hora ; tu vive , & vale.

S C E N A T E R T I A.

D A R I U S.

Abscedit ; & me sana suadentem negat
 Audire ! Legis ecce contemptæ reum
 Gens Satraparum tota Daniele arguet ,
 Gravibusque repetet debitum pœnis caput.
 Quid agam ? vel unde subtraham letho virum
 Meliora meritum fata ? Quod placuit semel
 Sancire , Regni jura mutari haud sinunt.
 Eheu ! quid egi ? video , properavi nimis :
 Cavisse decuit invidæ gentis dolos ,
 Nec ferre legem calculo quam non suo
 Daniel probasset ipse. Num regni tamen
 Impune tantum præripi patiar decus ?
 Quid me experiri cardine hoc rerum juvat ?
 O tu micanti cuncta quem Daniel canit
 Moderari ab arce ; nunc ades , precor , ô Deus !
 Magnique egentem consili aspirans rege.
 Natum evocemus ; si qua se monstret via ,
 Patrem adjuvabit. At prius ne me occupent

Satrapæ; nocendi neu quid officiat furor,
Prudens videbo. Portet huc aliquis gradum.

S C E N A Q U A R T A.

DARIUS, PHRAORTES.

DARIUS.

A Des huc, Phraorte.

PHRAORTES.

Præsto sum.

DARIUS.

Astyagem voca :

Resurget; adsit ocyus : tu, ne interim
Succedat aulæ quispiam, dum erimus simul
Intus, cavebis sedulo.

PHRAORTES.

Imperium exequar;

At Mithridates ecce succedit tamen,
Comesque sequitur Gazabar.

DARIUS.

Nam quid volunt ?

Ergo utriusque fugere conspectum haud licet ?

SCENA QUINTA.

DARIUS, GAZABAR, MITHRIDATES,
PHRAORTES.

GAZABAR.

R Ex, vive.

DARIUS.

Quæ vos cura sollicitos tenet;
Nec evocatos tempore alieno huc agit?

GAZABAR.

Violata Regni jura, Regnantum & decus,
Tuasque nullo, magne Rex, habitas loco
Impune leges querimur: ultricem manum
Scelus nefandum poscit.

DARIUS.

Hoc studium placet,
Et utriusque laudo generosam indolem.
Ast instat aliud; plura nec mihi jam vacat
Audire. Si quod fuerit admissum nefas,
Curas inanes pellite, ultorem dabo.
Valete. * Tu me sequere; nec quisquam huc
pedem

* *Ad
Phraor-
tem.*

Quicumque demum fuerit, injussus ferat.

S C E N A S E X T A.

GAZABAR, MITHRIDATES.

GAZABAR.

Q Uid esse dicam, Amice ? quæ gravior
potest

Stimulare Regem cura, dum regnis probrum
Sibi quæ placidus audit illatum ?

MITHRIDATES.

Stupor

Me similis urget ; nec quid acciderit novi,
Quo quo feratur animus, incertus videt.

GAZABAR.

Sensisti ut ægra Regis insolitus pavor
Turbavit ora, quando violatam audiit
Legem, reumque capitis ad multam peti ?
Ah ! video ; neque me credulum fallit malus
Error, metusve ludit. Hebræi scelus
Rex novit, aut non vana suspicio incidit.

MITHRIDATES.

Si novit ; ecquid quærere ulterius juvat,
Cur nostra fugiat ora, conspectum horreat ?

Damnare metuit nempe quem saluum velit.

GAZABAR.

Frustra est, Amice: nemo devotum neci,

Vel ipse rex si tentet, eripiat caput.

Decreta quisquæ nostra violavit nocens;

Hunc jura fontem cuncta damnari jubent.

MITHRIDATES.

Quem vehere primos certat ad honorum gra-
dus

Manifesta Regis gratia, & reliquos super

Posuisse Satrapas ambit; an lentus sinat

Perire eundem?

GAZABAR.

Si negat, cogi potest.

An ergo nullum, Satrapæ quotquot fu-
mus,

Vel inane gerimus nomen? Inceptum bene
est;

Structosque Daniel laevus in laqueos ruit:

Instemus operi: fata felicem exitum,

Ni robur animo desit ac virtus, dabunt.

MITHRIDATES.

Confide: stimulis paribus accensos habes,

Quoscumque Daniel jam diu imperio premit.

Nunc ergo , si qua est, rursus ad Regem viam Tentemus.

GAZABAR.

Ultro te sequor : jam jam sciet
Scelestus , aliquos esse quos sprebit , Deos.

Finis Actus primi.

ACTUS

De rebus ambo Regis affatum dari
 Peterent, loquendi pertinax spatium negat !

ASTYAGES.

Suis carere genitor ut Satrapis queat ;
 Naturamque patiens imperi in partem vocet ?
 Hoc credis ? hoc me credere hortator jubes ?
 Ten' lateat unum, Amice, quem pater ad gra-
 dum

Evchere Satrapas inter Hebræum paret ?
 Mox summa rerum nempe Danielem est penes ;
 Nihilque, Regis nomine excepto, manet
 Deinceps parentem ; non ego, æthereas faces,
 Cœloque quisquis regnat, auctor Deum,
 Dulce imperantum cupidus invidiam decus :
 Aut longioris pondus obsequii abnuam,
 Assyria per se regna dum genitor regat.
 At ipse rerum mole defessus gravi
 Quod facere refugit, sobole contempta, pater
 Moderanda tradat sceptrâ Satraparum in ma-
 nus ;
 Pudet, pigetque fateor ; & probri impotens,
 Huc usque docilis animus haud novit modum.

PHRAORTES.

Cuicumque sanguis melior in venis micat ;
 Quam sit negatæ laudis impatiens , scio ,
 Generose Princeps : inclytam novi indolem ;
 Mentemque rebus , quam geris , natam arduis ;
 Nec exerendæ , spero , virtuti locus
 Longum aberit ; animos interim ad tempus
 preme ;
 Consilia regis cuncta dum se se explicent ;
 Sensusque pandant intimi.

ASTYAGES.

Morem geram ,
 Amice , & ultro , quam petis , dabitur mora ;
 At ni querelas docilis admittat pater ,
 Habeatque iustas , quo loco deceat , preces ;
 Ignosce , si quid

PHRAORTES.

Ah ! cave ; namque huc subit
 Rex ipse , cedo.

SCENA SECUNDA.

DARIUS, ASTYAGES, PHRAORTES,

DARIUS.

Ne pedem hinc retro feras,
Phraorte: quidquid hinc rei est, totum hoc
bene

Animo fideli creditur. Patrem adjuva
Tu nate, rebus, quam potes, dubiis opem
Ne ferre pigeat.

ASTYAGES.

Sorte nunc demum sua
Lætum ac beatum, genitor, Astyagem nimis,
Præstare si quid liceat, unde animus, fides
Consent parenti!

DARIUS.

Nate, ut hic sensus placet!
Ut me ista pietas recreat! mentem adjices;
Et quid juvare cardine hoc rerum patrem
Possis, docebo. Quo mihi positus gradu,
Orbi verendum quam sit Assyrio caput

Hebræus ille , merita cui pridem inclyta
 Tam grande nomen tamque conspicuum de-
 cus

Fecere , nosti. Sensit ingenium sagax ,
 Mentem & futuri providam expertus, virum
 Honore coluit multo & insignem dedit
 Tenere reliquos Satrapas inter locum
 Nabuchodonosor ; ipse fatorum asperas ,
 Quod imminebat , Baltasar doctus malum ,
 Ni mens fuisset læva, fugisset vices.

ASTYAGES.

Jam nota loqueris , genitor ; at si quid levī
 Meruisse Daniel potuit obsequio , satis
 Numquid repensum est ? affatim indultus
 favor

Officia vel majora pensasset bene.

DARIUS.

Quid loqueris ? an te pariter infelix quatit
 Stimulatque livor , Nate ? Ne doleas tamen ;
 Huc usque tanto quidquid impensum viro
 est ,

Regnis , mihi , tibi que id impensum fuit.
 Scis ipse ; quo non cæca dominandi fames



Et tacita Satrapas odia , malefidum genus ,
 Agant furentes : struere fallaces dolos ,
 Suisque vitam regibus , sceptrum aut malas
 Rapere per artes , hoc student unum , labor
 Hic unus ; isto scelere sed Daniel vacat ,
 Moreſque ſolus impios , plenus Deo ,
 Quem vaſta mundi ſpatia moderantem colit ,
 Damnavit uſque . Gentis hinc dudum efferæ
 In ſe furores movit ; hinc pœnas graves ,
 Mea ni reſiſtat cura , ni præſens opem
 Et ipſe tuleris pariter , immeritus dabit .

ASTYAGES.

'Aſt ille pœnas unde jam metuat , gradum
 Per te aſſecutus penè regali parem .
 Hinc Satraparum futiles ſpernat minas
 Impune ; tuque plectere ut ſontem velis ,
 Fruſtra lacellſas invium letho caput .

DARIUS.

'Ah ! ne parentem , Nate , nil meritum aſperes ;
 Tumida reſidat ira ; veſanos preme
 Animi tumultus ; ſiquid offenſus doles ,
 Regni cupido ſi qua ſollicitum fodit ,
 Conſide ; ſuperi vota quamprimum audient ,

Jam me senectus ægra, me dudum meus
 Amor volentem, facere quid deceat, monent,
 Inducias te genitor exiguas rogat;
 Operique, quod jam meditor, admoveas ma-
 num.

ASTYAGES.

Tam dira me libido, dum lucem aspicias,
 Regnasque, vanum stimulet? Hoc credis pater?
 Suspicio tibi tam prava de nato incidit?
 Proh! dura mea nunc fata! Me vivum prius
 Tellus profundo condat æternum sinu;
 Missumve cœlo fulmen in miserum ruat;
 Quam sceleris hujus videar admissi reus.
 Fidem experire, genitor, obsequium proba;
 Et infidelem nactus Astyagem abjice.

DARIUS.

Bene est, abunde est: hoc mihi solum peto
 Fidei & amoris specimen, hoc unum annue
 Ut imminenti, Nate, Daniele eximas
 Mortis periclo; nostra, quæ nulli licet
 Violare, jussa sprebit, & vetita palam
 Suum obsecravit Numen impavidus prece.
 Res nota Satrapis: gentis ingenium mala

Tales tetendit, queis virum caperet, dolos;
 Namque ipsa legem fixit arbitrio, & mihi
 Nil cogitanti tale signandam obtulit.

Jam venit impos mentis atque odio furens
 Cum Michridate Gazabar; paribus reum
 Animis parabant agere, nisi vocem occupans
 Rerumque molem fraude mentitus pia,
 Hinc sustulissẽm me me ab utroque ocys.

S C E N A T E R T I A.

DARIUS, ASTYAGES, PHRAORTES.
 M I L E S.

HUc ambo Satrapæ Principes aditum pe-
 tunt.

DARIUS.

Mea sic facessunt jussa? Jam menti excidit
 Fuisse vetitum, nequis huc ferret pedem.
 Injussus?

MILES.

Equidem fateor: ast instant tamen,
 Gravesque, si quid creditur, causas habent,
 Quæ longiorem ferre non possint moram.

DARIUS.

DARIUS.

Dic in penates intimos flectant gradum ;
Mox adcro.

SCENA QUARTA

DARIUS, ASTYAGES, PHRAORTES.

DARIUS.

Cernis, Gnate, quo livor nocens,
Aperta quo non odia præcipites agant ?
Etiamne patiens triste servitium feram ?

ASTYAGES.

Age ergo, Genitor ; quin jugum turpe excutis :
Pulsi quiescant Satrapæ : Imperium rege
Solutus ; nec ultra Sceptra moliri audeant.

DARIUS.

Utinam liceret, Nate, quod suades sequi ;
Talesque regni fata paterentur vices !
Lux forte veniet illa, cum faciles Dei
Feliciorem rebus ostendent viam.
Quod urget, unum adverte ; quo possit modo
Jam provideri certa Danieli salus.

ASTYAGES.

Tuum imperare est, Genitor, & nostrum obsequi.

DARIUS.

Olli salubrem, Nate, curemus fugam :
 Spes illa superest una, si saluum velis.
 Seuera regni jura ; nec regem est penes,
 Quantum laboret cumque, dum Satrapæ ab-
 nuunt ,
 Eripere letho legis infractæ reum.
 Hoc agere præstet ; exteram ut Daniel queas
 Adire terram sospes, & quantum patet
 Caldæa, nostris protinus migret plagis.
 Amica Persis dulce perfugium dabit :
 Notumque Cyrus hospitem accipiet lubens.
 Babylone Daniel aderat ante annos decem,
 Cum victa Medis pariter ac Persis, mihi
 Cyroque cessit, nostrum & excepit jugum.
 Jam tum futuri præscius, rerum & sagax
 Danielis animus nomen in clarum iverat,
 Cyrique in aula grande retinebat decus.
 Cyrum ocyus monebo, quo Daniel gradu
 Mihi sit, vel orbe dum procul nostro exulat.

Hoc providebis ergo ; tecum erit hic labor ;
 Ut nocte captet proxima incolumis fugam.
 Reviso Satrapas interim , & placide audiam ,
 Jactare quidquid gravius in Hebræum pa-
 rant.

Tum velle totum excutere dum per me scelus
 Videor , morarum , cardine hoc rerum , fatis ;
 Perficere cuncta commode ut liceat , traham.

ASTYAGES.

Confide , Genitor ; quod jubes cumque , exequar.

S C E N A Q U I N T A.

ASTYAGES , PHRAORTES.

ASTYAGES.

Vicimus , Amice ; fronte mutata redit
 Fortuna melior , rebus & nostris favet.
 Eamus ; ultro quam pater miserans opem
 Impendi Hebræo postulat , dabimus.

PHRAORTES.

Fugam

Ipse adjuvabis ? tamne mutatum rear ?

C ij

Concepta placidis odia sic animis cadunt ?

ASTYAGES.

Quin me juvarent odia, dum superest nihil
Deinceps timendum. Fugiat, & vitam trahat
Impune Daniel; nil moror; nullos metus
Dum faciat, & non debito cedat loco.

Ah! paribus utinam legibus talem queant
Satrapæ mereri gratiam, invisum genus,
Paterna quot quot Sceptra moderari ambiunt!

PHRAORTES.

Parumne gentis Principem in geminum in-
vehi

Rex visus? ipse testis audisti, quibus
Utriusque fraudes impias sensit probris:
Nec lentus aderit ultor.

ASTYAGES.

At eisdem timet,
Odisse vel si possit, infensus pater.

PHRAORTES.

Etiam timere desinet, nutantem adhuc
Capiti coronam longa cum tandem dies
Firmarit.

ASTYAGES.

Et nos turpe servitium interim

Feremus ?

PHRAORTES.

Hæc te cura sollicitum coquat ?

Meliora potius fata dum se se explicant,

Hinc augurare melius.

ASTYAGES.

Ignosce, obsecro,

Amice ; me si forte regnandi fames

Iniqua stimulet ; recta suadentem sequar.

Quod visa mihi fors jam dare , apponam

lucro ,

Et lætiores, dum ferat , patiens vices

Sperabo : sed tu patris in Satrapas move

Animos & iras : retege fallaces dolos ;

Tacitisque semet credat insidiis peti.

Ego hinc parentis, jussa quo rapiunt , feror.

PHRAORTES.

I , perge , Princeps ; sequere felicem impetum,

Et mancipatam crede , quam repetis , fidem.

Finis Actus secundi.

ACTUS TERTIUS

SCENA PRIMÆ.

DARIUS, MITHRIDATES, GAZABAR:
PHRAORTES.

DARIUS.

Metus omnis absit ; non ego invisum
velim

Fovere facinus ; lege contempta nocens
Quicumque fuerit , debitas pœnas luct.
At ista , Proceres , causa sedatos petit
Animos , nec ante debet immanes reus
Subire pœnas , quam suæ admissus palam
Causæ patronus , qua licet , probrum eluat.

MITHRIDATES.

Jam dicta causa est , hic ubi constat scelus ,
Et tot revinci testibus factum potest ,
Quot aula Satrapas , ipsa quot cives habet

Numerosa Babylon. Nam neque abstrusus
domi,

Tectusve latebris, supplici Daniel genu
Suum obsecravit Numen, at aperto in loco,
Et unde fugere nequeat aspectum, hinc
nihil

Mandata veritus regia, illudit sacras
Impune leges. Vidit indignans probrum,
Nec inulta siluit turba: conclamat; graves,
Dirum execrata facinus, intentat minas.
At non moveri visus, aut victus metu,
Votis pepercit; animum in errore obstinat,
Iteratque vetitas usque contemptor preces.

DARIUS.

Confidite: ultor aderit, & fontem manet
Æquanda sceleri pœna: præcipites tamen
Retinere motus, æquitas, ratio admonent,
Alioque digna præmio, in rerum arduis
Probata virtus, & viri constans fides.
Ipsa, ipsa Babylon novit, & qua panditur,
Utrumque didicit orbis Assyrii latus;
Quis ille, cujus poscitur letho caput;
Quoties per ipsum parta Babyloni salus.

Ergo quis in me parcat opprobrium asperæ
 Jactare mortis, si quid in talem virum
 Properasse nimum videar? ah! si dura lex
 Regnique jura cadere Daniele volunt;
 Æquas queratur nemo damnantis moras.

GAZABAR.

Quas petis, iniquas ipsa lex damnat moras;
 Damnantque Satrapæ pariter: iratus fremit
 Et ipse populus; ac nisi fontis nece
 Justo furori protinus fiat satis,
 Nequid sinistrum tentet insipiens, cavet.

DARIUS.

Frenare vestrum est & coercere impetum.

GAZABAR.

Populi furentis impetus nescit modum.

DARIUS.

Quiescit ultro, ni quis incendat, furor.

S C E N A S E C U N D A.

DARIUS, MITHRIDATES, GAZABAR,
ASTYAGES, PHRAORTES.

ASTYAGES.

LIceat remotis alloqui patrem arbitris.

DARIUS.

Ite ambo, neque vos ullus excruciet labor.
Suum verendas usque & illæsum decus
Leges manebit, spondeo; hoc unum, obsecro,
Consulte; nequid deinde turbarum audiam.

GAZABAR.

Quam polliceri facile, tam pronum id foret
Præstare, Princeps, quod petis: tecum hoc
vide:

Ast unus ipse facere, quod mandas potes.

S C E N A T E R T I A.

DARIUS, ASTYAGES, PHRAORTES.

DARIUS.

ECquando tumidos spiritus tandem premam,

Cogamque dociles Regis imperium pati?

ASTYAGES.

Regnas; & istud, Genitor, ambages parit?

Agedum experire, jura dominantis probent;

Nati & ferendo, perpeti discant jugum.

DARIUS.

Primum quod instat, Nate, jam factum est opus.

Mox, crede patri, sceptrum quis teneat, scient.

Jam fare; qualem nuncias rerum exitum?

Quid me jubes sperare?

ASTYAGES.

Nil actum est, pater;

Et quam obtulisti, rejicit Daniel fugam.

Suasi, rogavi, quolibet me me sagax

Converti ad artes, cuncta tentanti irrita

Cecidere: perstat usque propositi tenax,

Nefasque reputans fugere, dum solus Dei
Cultus nocentem fecit; horrendam prius
Subire mortem, tale quam probrum, velit.

D A R I U S.

Quæ pars salutis est super; vel quis modus;
Inire, quæ jam est una, si refugit, viam?

A S T Y A G E S.

Me cura similis angit: at vel si annuat,
Vix ullus esse nunc fugæ possit locus;
Tam multa populi turba circumdat virum;
Tantos & illa pertinax motus ciet.

P H R A O R T E S.

Adest fidelis ille Danielis comes;
Et ora lævum mœsta nescio quid canant.

S C E N A Q U A R T A.

DARIUS, ASTYAGES, PHRAORTES,
JOSEDECUS.

D A R I U S.

Josedece.

J O S E D E C U S.

Sacros pronus advolvor pedes.

DARIUS.

Quid vis ? quis ægro luctus in vultu sedet ?

JOSEDECUS.

Actum est : periclo ni statim saluum eripis ,
 Certamque rebus perditis affers opem ,
 Rex magne ; fato lugubri Daniel perit !

DARIUS.

Infanda nam quæ fata Daniele petunt ?

JOSEDECUS.

Paryos penates populus immensum fremens
 Obsedit , & nil tale promeritum , neci
 Dandam reposcit victimam : tectis faces
 Impune , passim tela cum saxis volant !
 Ac ni furori fida sociorum manus
 Huc restitisset usque , jam fracto objice ,
 Lymphata miseros turba vertisset lares.
 Nam gens iniqua Satrapæ , & dirum nefas
 Meditata , stimulis acribus populum incitat ;
 Et læsa regni jura per totam ferens
 Babylona , fontem mortis in pœnam vocat.
 Te si qua miseri cura Danielis movet ,
 Rex magne ; studio si quid assiduo potest
 Meruisse , capiti funus infandum amove.

DARIUS.

Gens perduellis has mihi turbas agit
 Odiisque, spreto rege, servire obstinat?
 At non inultum noverit jam jam scelus.
 Phraorte, propera: reprime furialem im-
 petum,

Mihique tecum siste Danielem ocyus.
 Sic jubeo: quisquis ponere audebit moras;
 Vel Mithridates, Gazabar vel si fuit,
 Per astra juro, vindicem agnoscet manum.

PHRAORTES.

Rex magne, saluum præsto, vel nostrum in
 caput,
 Si quam minantur fata, tempestas ruet.

SCENA QUINTA.

DARIUS, ASTYAGES, JOSEDECUS.

DARIUS.

NAm quis tumultus inter ac tristes minas
 Danielis animus? quo videt vultu efferae
 Plebis furores, atque Satraparum truces
 Advertit iras?

JOSEDECUS.

Fortis, impavidus, sui
 Similis, nec ullo mortis infractus metu,
 Utriusque sortis placidus expectat vices.

DARIUS.

Sic ergo rigidus dulce consilium abjicit;
 Et, quam salutis facio, non patitur viam?
 Tun' ipse amicum lentus in apertam rapi
 Sinas ruinam? Tam parum solers fuit,
 Aut tam remissas extulit vires amor;
 Ut non amantem flecteret?

JOSEDECUS.

Tene, ah! graves
 Augere luctus, magne Rex? tene asperum,
 Heu me! quod alto pectori infixit dolor,
 Stimulare vulnus? quid ego inexpertum tuli,
 Dum præviderem mente præfaga malum,
 Funestum ut omen fallerem? Ut sæpe institi,
 Periculoso ne suum obsequio Deum
 Coleret; iniquum donec edictum abrogans,
 Obicem amoveres ipse. Sed frustra: horruit,
 Meque execratus consilii auctorem impii,
 Immotus usque, durus, intractabilis,

Rupisque more nescius flecti, stetit.

En prodit ipse.

ASTYAGES.

Quanta tranquillo nitet

Gravitas in ore !

S C E N A S E X T A.

DARIUS, DANIEL, ASTYAGES,
PHRAORTES, JOSEDECUS.

PHRAORTES.

Vicinus; cessit furor

Populi impotentis : placidus imperium audiit,

Turbisque posuit, regis ad nomen, modum.

En ipse Daniel salvus ac sospes subit.

DARIUS.

Bene est, Phraorte; rursus ad populum redi;

Ultraque ne quid agitet, attentus cave.

* Quæ te in pericla mittis, & studio tui

Quantum sub imo corde mihi curam injicis,

* Ad
Daniel
lem,

Magnanime Daniel !

DANIEL.

Quam geris pro me, exuas,

Rex magnæ , curam ; quid quid eveniat , levis
Jactura nostri fuerit.

D A R I U S.

Ah ! potius , rogo,
Vide , ut periclo , dum potes , vitam eximas.
Quid renuis ? aut te cur fugæ tantum piget !
Tibi Persis ultro , Media hospitium dabit :
Potensque gemini Cyrus ac Dominus soli ,
Tanto beatus hospite , acceptum polo
Munus fovebit , & memor grates feret.
Te coluit ille quondam , & obsequio pari
Tuum fatetur atque veneratur Deum.
Ut te reviset latus ! ut longas bene
Avidus utrinque redimet amplexus moras !

D A N I E L.

Istis levare parce , quam suades fugam.
Non renuit animus fugere ; nec gravius pati ,
Quod imperasse placeat , exilium timet.
Hinc in recessus orbis extremos jube ,
Deserta mundi spatia , solisque hætenus
Habitata monstretesqua ; vel fragili rate
Penetrare cæcos æquoris vasti sinus ;
Dum fata præter dura , casusque asperos

Nil sit timendum ; te mihi testem invoco ,
 Te , qui latebras cordium aspectas Deus ,
 Quocumque lethi genere si metuam mori.
 Ast una pavidum causa fugiendi facit ;
 Plenamque sceleris animus horrescit fugam.

D A R I U S.

Quid metuis ? animus quod sibi fingit scelus ?
 Scelus est periculum fugere , & immeritas
 procul

Arcere pœnas ?

D A N I E L.

Fugere si nequeam innocens,

Scelus est.

D A R I U S.

Sed unde non potes fugere innocens.

Quæ te nocentem culpa , si fugias , habet ?

D A N I E L.

Id quæris ? Egone legis injustæ probrum
 Suum & supremo Numini ereptum decus
 Impune patiar ? publicum vel si nefas
 Palam improbasse videor , & læsos Deï
 Reparasse cultus ; jamne dissimilis mei ,
 Fœdaque facinus inclytum aspergens nota ;

D

Dare terga retro transfuga infamis queam ?
 Ah ! parce : vano forte superatus metu,
 Cupidusque vitæ si profugissem prius ;
 Ad hoc redirem , magne Rex , turpem ut
 cruor

Per mille fusus vulnera elueret fugam.

ASTYAGES.

Proh ! quanta virtus ! proh ! viri digna indoles
 Meliore fato !

DARIUS,

Cur tuam præceps ruis

Ultro in ruinam ? Ne mihi, quando hic super,
 Aditus salutis unus est ; illum eripe ?
 Hoc me rogantem sustine , vel si magis
 Placet imperata facere , regnantem feras.

DANIEL.

Mene ista posse ? quod jubes , Deus hoc vetat.

DARIUS.

Nam cur vetaret ? Nempetam durum putem
 Rigidumque Numen quod colis , vitam ut suis
 Adimat , velitque sceleris expertes mori ?
 Aliud dedisti specimen ; ut facilem , & bonum
 Piumque quoties ipse jactasti Deum.

DANIEL.

Nihil hinc refingam : facilis & bonus hic
quidem

Piusque Deus est , quem colo : ast idem
potens

Vitæ necisque Dominus : utrumvis petat ,
Utrinque fidum pariter obsequium exigit.

S C E N A S E P T I M A.

DARIUS , DANIEL , ASTYAGES ,
PHRAORTES , JOSEDECUS.

PHRAORTES.

POpuli invalescit ardor , ad primas redit
Furias , nec ultra regis imperium valet
Frenare motus , ipse ni præsens malo
Paret mederi ? Civium iratis micant ,
Scelerata manibus arma ; properato est opus ;
Vel iniqua miserum fata Danielem obruent.

DARIUS.

Sic nullus aderit usque turbarum modus.
Ibo , ibo. Sed enim sceleris auctores , polum
Et astra testor , quas decet , pœnas dabunt.

D ij

DANIEL.

Ah! potius, in me totus exundet furor :
 Avidamque nostro sanguine exfatiet sitim !
 Meum omne scelus est ; unus ad pœnas vocor ,
 Rex magne : me me victimam redde ocyus ;
 Me perime : postquam noster explerit cruor
 Animos feroces , blanda pax populis , quies
 Redibit urbi.

DARIUS.

Frustra es.

DANIEL.

Hoc unum annue ,

Per si qua pietas ! Genibus affusum vides
 Miseresce.

DARIUS.

Redeo , Nate : Danielelem interim
 Tuere , neve regia exportet pedem ,
 Caveto.

DANIEL.

Saltem patere , te comitem

DARIUS.

Resiste.

S C E N A O C T A V A

DANIEL, ASTYAGES, JOSEDECUS.

DANIEL.

Justas furdus elusit preces.

Fugitque; placidum te mihi experiar magis,
Magnanime juvenis; da levi pretio graves
Restinguere iras? cadere da populi manu.
Vel si nocentem durius lethi genus
Decuit; leonum pergo feralem ad lacum, †
Ubi præda rabidis debita obtingam feris.

ASTYAGES.

Huc sequere potius, æquior donec viam
Fortuna pandat; si quid Astyages potest,
Animum probabis ipse & addictam fidem.


DANIEL.

Parebo: quovis vel reluctantem trahe.

JOSEDECUS.

O tu piorum tutor ac custos Deus,
Quas tanta pietas mernit, exsolvas vices!.

Finis Actus tertii.



ACTUS QUARTUS

SCENA PRIMA.

DARIUS, DANIEL, ASTYAGES,
JOSEDECUS.

DANIEL.

FRustra repugnas; hæcenus fatis est datum,
Rex magne, amor: cede; quid rursus
aspera

Mollire tentas corda? spem vanam abjice:
Nec frena patitur plebis insanus furor;
Nec ponere odiis Satrapæ norunt modum.
Me crede mihimet, aut mei potius Deo
Committe curam: justus est cælo Deus;
Preces nec ille corde conceptas pio
Aversus unquam sprevit. O utinam sinus
Cordis paterent intimi, & quod vix loqui
Possim, videres! Grande nescio quid sibi
Promittere audeat animus, & spes hic novas;

Omniemque pene quæ fidem superent, fovet.
 Fera bella moveant, corpus objectent feris,
 Quos odia, quos & livor in nostrum caput
 Incendit hostes; ne time; insontem haud
 petit;

Sua sed nocentes pœna, Rex magne, obruet.

D A R I U S.

Quo raperis? Ecquid dura properantem
 juvat

Lacessere ultro fata? Sed video satis,
 Quæ fodiat ægrum cura; dissimules licet,
 Video innocentes, quos mihi nectis, dolos.
 Te nostra pietas angit, & quem pro tua
 Ferimus salute, turbat ancipitem labor.
 Hac nos levare mole vel proprio bonus
 Ambis periclo: cadere tibi pulchrum æstimas,
 Pulso tumultu blanda dum redeat quies.
 Hinc robur animis additur? spes hinc nova,
 Quam pascis; & qua, facere si possis fidem,
 Nobis dolorem pariter & curam eximas.
 Tamen hæc omitte; nil agis: pia fraus patet.
 Quantoque nostri visus es cupidus magis,
 Tanto esse tua jam carior meruit salus.

Confide : quovis impotens Satrapas agat ,
 Vel stimulet ira ; quid quid invisum aggredi
 In me meosque populus effrenis paret ;
 Te nostra , Daniel , dextra defensum dabit ,
 Vixisse tecum potero , vel tecum mori.

DANIEL.

Ah ! parce : quid enim suadet imprudens amor ,
 Rex magne ? quanquam nec tuo dignus forem
 Amore , si quod loqueris , id merito imputes.
 Talem æstimares nempe , qui mediter levem
 Fecisse fucum ? qui palam imbellem velim
 Jactare frustra , cultor insipiens , Deum ?
 Agnosce , quale Numen Abrahamo fata
 Soboles vereri certet. Haud vano deos
 Errore fictos , filice vel sterili colit
 Excisa trunco monstra ; queis surdæ patent
 Aures , & oculis qui nihil apertis vident.
 Ille , ille quem nos colimus , & justas preces
 Audit ; labores , qui premunt miseros , videt :
 Opemque ferre rebus afflictis amat.

DARIUS.

Eccur benignam retinet ulterius manum ?
 Cur invocatus non adest ? vel cur opem
 Gravibusque

Gravibusque differt facere medicinam malis ?
 Nempe opperitur ille , dum nullum salus
 Absumpta tandem linquat auxiliûs locum.

D A N I E L.

Ut ratio tua te fallit ! ut nosti parum ,
 Rex magne , qualem , quamque diversam hic
 Deus

Inire soleat more ab humano viam ! ..
 Cum nulla restat spes super ; cum perdita ,
 Et lapsa retro cuncta perniciem putes
 Certam minari ; cardine hoc rerum ultimo ;
 Deus ille , cuius servit imperiis mare ,
 Cœlumque , & orbe quidquid in vasto subest ,
 Se prodit ; atque quantus est , tantus solet
 Populis videri.

D A R I U S.

Proh ! mihi qualem occinis,
 Et quam periculo spem facis plenam gravi !
 Ergo perire te sinam , ut saluum velim ?
 Salyusque nequeas esse , ni pereas prius ?
 Mirum salutis ô genus ! Spes ô nova ,
 Inusitata quam foves ! aliud doce
 Sperare , tuus hic aliud afflictis Deus
 E

Addat levamen; quidpiam vel me finat
Tentare pro te melius.

DANIEL.

Hæc sentis? loqui
Nec ista, Princeps, te piget? talem parens
Rerum & supremus arbiter labem ferat?
Josedece, cur hîc trahimus indecores moras?
Juvat ire: fuso sanguine opprobrium eluam.
Felix in ipsa morte, si gravius nihil
Deus ille, quem sic lædis, in pœnam exigat!

ASTYAGES.

Abscedis? ah! ne sequere præcipitem im-
petum:

Ignosce, studio si quid erratum est tui.
Timore plena sedulo res est amor;
Nec imputandum credidit sceleri pater;
Unde, unde tandem parta dilecto salus
Capiti veniret.

SCENA SECUNDA.

DARIUS, DANIEL, ASTYAGES,
JOSEDECUS, PHRAORTES.

DARIUS,

Quid refers? quo res loco;

Phraorte?

PHRAORTES.

Quo non stare, vel dici queant

Pejore; nam si turbidis rebus brevem

Afferre Regis visa majestas moram;

Animisve si quis additus pavidis metus;

Vix retulisti regiis laribus pedem,

Vires resumpsit, obice seu rupto, furor,

Omenque lævum, triste, luctificum canit.

Totam per urbem quippe rumorem ferit

Cum Mithridate Gazabar; cladem horridam

Instare populis, si quid indultum reo

Fuerit; nec esse Regis arbitrium penes

Eximere letho, spreta quem fontem arguant,

Meritaque regni jura damnarint nece.

E ij

DANIEL.

Vides , inanis quam foret deinceps labor
 Tuus ille pro me ; lata lex : Satrapæ jubent :
 Populus furoris impotens pœnam irrogat.
 Patere antevertam vota ; da , rabiem expleam :
 Ultroque , quo me rapere festinant , sequar.
 Unum , per istos , quos ego amplector pedes ;
 Per ista , Princeps , genua , ut exorem , sine.
 Nihil est iniquum quod petam ; nihil est ,
 ferox
 Quod hostis ipse , si quid humanum sapit ,
 Invideat.

ASTYAGES.

Heu ! quid , dum peris , etiam juvat ?

DANIEL.

Perire nil me pigeat : at si me Deus ,
 Deus ille , cujus ambiam imperio immori ,
 Pericula inter media securum dabit ;
 Si dira rabidis ora concludet feris ,
 Unum hoc rogantem sustine ; hoc unum mihi
 Sperare de te liceat.

DARIUS.

O utinam ratas

Et ipse, quas periculi oblitus foves,
 Spes facere possis! sed tibi obstringam fidem.
 Quodcumque petere lubeat, incolumis feres.

ASTYAGES.

Et hoc precantem, mi Pater, natum audias.
 Amica nobis si qua Daniele velint
 Servare fata sospitem; & easdem vires
 Subire pariter, fraudis artifices malæ
 Cogantur.

DANIEL.

Haud me dira vindictæ sitis
 Estimulat, istud facere nec votum placet.
 Vivant, suoque scelere vel dignas queant
 Fugisse pœnas, nil moror: ast unum polo
 Numen verendum facinoris memores tre-
 mant.

Audere nec si quidpiam contra parent,
 Jactent inultum. Tuque numerosæ potens
 Regnator aulæ, tota quem patiens jugi
 Babylon timere didicit; hunc pariter time;
 Reges in ipsos cujus imperium est, Deum.

DARIUS.

O tu potenti cuncta qui nutu quatīs,
 E iij

Imosque ab alto pervides cordis sinus:
 Nosti; colendos uspiam si quos putem
 Te præter, aut si venerer infidus Deos?
 Ades huc; & istud, quod geris, tandem exere,
 Imperium in omnes: urbe qui tota calent,
 Compesce motus; blanda succedat quies:
 Et efferatos alta pax animos regat.
 Vel si stupendis rursus ostentis amas
 Notescere orbi; dumque inextinctam famem
 Reprimis Leonum, si tuum populis placet
 Palam approbare Numen; hoc ipsum invoco,
 Testorque; qui me cumque regnantem colit,
 Unum perenni te Deum obsequio colet,
 Confide, Daniel. ...

PHRAORTES.

Turbidus fert huc gradum,
 Cum Mithridate Gazabar.

S C E N A T E R T I A.

DARIUS, DANIEL, ASTYAGES,
GAZABAR, MITHRIDATES,
PHRAORTES, JOSEDECUS.

DARIUS.

Quo vos furor ?

Quo cœca rapiunt odia ? sic placidos mihi,
Sic obsequentes se probant ? ubi, ubi pudor,
Pietas, fides, amorque ? Nil Regis preces,
Nil iussa valeant ; non mihi insignem virum
Clarumque meritis, dulce præsidium imperi,
Urbisque & orbis pariter Assyrii decus
Servare per vos liceat ?

MITHRIDATES.

Infantes cave

Onerare probris : nostra nil in te fides,
Nil peccat animus : temet incusa mali
Causam tumultus ipse, dum iusto caput
Subtrahere letho tandiu meritum obstinas.

DARIUS.

Et perduelles, credo, quas turbas cient,

E iii

Mihi imputabunt ? unus inveniar nocens ?
 Definite fucum facere ; mendaces doli
 Astusque fictæ mentis hostiles patent.
 Scio quo ferantur vota ; quid tantum incitet
 Animos feroces.

MITHRIDATES

Legibus, Patriæ, Deis,
 Regno Tibique reddere intactam fidem,
 Hæc vota, Princeps, nostra sunt ; animum hic
 fodit
 Urgetque stimulus.

DARIUS.

Patriam, Regem, aut Deos
 Curant scelesti ; dum suum Patriæ decus
 Columnenque Regno grande præreptum volunt ?
 Populos ad arma dum vocant ; dum vim
 palam
 Inferre Regi, nec meis me ædibus
 Pudet obsidere : quodque crediderim magis
 Mihi luctuosum, dum polo & terris potens
 Nostriſque toties Regibus temere pctunt
 Fatale Numen.

GAZABAR.

Apage peregrinum procul

Mendaxque Numen : Belus est nobis Deus ;
Gens nostra reliquos nescit ac refugit Deos.

DANIEL.

Tamen hoc verendum moris ac disces brevi
Numen tremendum , cujus aut fingis male
Nescire mendax , cognitum aut spernis genus.

GAZABAR.

Quid ille possit , quem mihi jactas Deum ,
Prior experire : pulchrius nusquam queat
Probare , si quid juris in terras habet.
Faceffe legum jussa & horrendæ specus
Ingredere latebras : hinc Deus saluum tuus
Te præstet ; avidas , nequid officiant , premat
Fauces Leonum. Quid times ?

DANIEL.

Timidum arguis ?

Timeat ; inanem quis quis aut Belum colit :
Simulacra vel qui casta reputavit Deos.
At te verende generis humani fator ,
Qui sequitur , ille nescit ignavos metus.
Documenta dabimus ; quod jubes , ultro ex-
quor.

Sequere, antecedo: nulla me retinet mora.

DARIUS.

Ah! siste Daniel. Vosque, si Regem decet
Quidquam rogare, supplici obtestor prece:
Deponite iras; facite pietati locum.

MITHRIDATES.

Nil vana peccat ira; sed nullus potest,
Nullusve meruit esse pietati locus;
Dum læsa Regni jura vindictam exigunt

DARIUS.

Navata Regnis opera quod pretium feret?

MITHRIDATES.

Hodierna laudem macula præteritam abstulit.

DARIUS.

Ah! video: plus vos odia, quam legum movet,
Studiumve Regni!

DANIEL.

Cur mihi oblatum doles

Testandi ubique Numinis veri modum?
Ne metue: tantum fac datam exsolvas fidem;
Nostrique Babylon vindicem æternum colat.
Meme ad Leones ducite.

JOSEDECUS.

O fortem virum ;

Et alia meritum fata !

DARIUS.

Nil ergo est super ,

Quo rigida moveam corda ? nequidquam
institi ,

Monui , rogavi utrumque ; descendi ad preces

Haud rege dignas ! odia vesanis placet

Explere ! Nil repugno ; supplicium petat ,

Tristemque Daniel subeat immeritus lacum.

At si quis inde sospitem reddat Deus ,

Per sceptrâ juro , fata vos eadem manent.

Hac lege vinctum rapite , quo suadet furor.

GAZABAR.

Bene est ; & ista lex placet.

DANIEL.

Princeps , vale ,

Donec reducat Lucifer mundo diem.

DARIUS.

Amice , ni spes ista metuentem erigat ;

Non te hinc revelli patiar.

JOSEDECUS.

Accedam comes.

DANIEL.

Subsiste : quæ te cura sollicitum tenet ?

JOSEDECUS.

Certum est easdem perpeti tecum vices.

DARIUS.

Tu, Nate, postquam fuerit ingressus lacum
Daniel, sigillo, ne quis irrepat dolus,
Fauces baratri munies.

ASTYAGES.

Iussa exequar,

Dilecte genitor. . . . Si quod est numen polo,
Sceleris nefandos poena in auctores cadat.
Phraorte, sequere pariter, & fidas mihi,
Quocumque ducit aditus, exubias loca.

Finis Actus quarti.

~~~~~  
 \* \* \* \* \*  
 ~~~~~

ACTUS QUINTUS

S C E N A P R I M A.

D A R I U S, dormiens.

TEn' video? salvus tun' mihi ac sospes
 redis,

Generose Daniel? ergo mitescunt feræ?

Tibi Leonum parcit immitis furor?

Ades huc: amicos regis amplexus pete,

Et nostra se se gaudia * Heu quid dico? ubi ^{Evigila-}
 est?

Quo raptus oculis & meo avulsus sinu

Recessit? an me fallit incautum sopor?

Vigilemne larva ludit? . . O nimium breve

Quintus repente gaudium excepit dolor!

Nam quo sinistri non agunt animum metus?

Vivit? cruentas pavit an Daniel feras?

Ah! si periculo victus occubuit neci;

Quid agam? protervos ut dabunt de me jocos

Satrapæ feroces ! turgidos quo non ferent

Impune fastus ? Stulte , properavi nimis !

Periculosam debui fati aleam

Timere ; variis debui invidiam artibus ,

Longaque furias fallere injustas mora.

Tamen cliente pro suo nihil hic Deus

Fecisset , olim tam potens ? aliud decet

Sperare . . . Nullus interim mihi se objicit ?

Jussus redire Natus eccur non adest ?

Ah ! video : tristi nuncio pavidas timent

Percellere aures ! Quidquid est jam jam eruam.

Huc aliquis . . .

S C E N A S E C U N D A .

DARIUS. PHRAORTES.

PHRAORTES.

Adsum.

DARIUS.

Nam quid hîc cessas ? age ,
Phraorte ? Daniel vivit ?

PHRAORTES.

Allatum est nihil ,

Rex magne.

D A R I U S.

Periit ! Filius nondum est redux ;

P H R A O R T E S.

Vix prima cœlo luxit obscuro dies.

Amica nobis fata si servant virum ;

Mox victor aderit.

D A R I U S.

Desine ambages loqui ;

Aperta loquere ; vivit ? an fatis minor

Cessit procellæ ?

P H R A O R T E S.

Nil ego attestor polum ,

Vel fingo vel dissimulo ; quod notum est , lo-
quor.

Ast inquietam quid juvat tristi omine

Torquere mentem ?

D A R I U S.

Terret incertum , modo

Quæ se videndam res mihi in somnis dedit.

Jam pene olympo pulsa nox solitum egerat

Ingrata spatium , corde sub vigili graves

Lenire curas dum mihi somnus negat.

Tandem receptus languidis ægre sopor
 Oculis; & artus dubia tentavit quies.
 Tum surgere atro visus est Daniel specu
 Totoque salvus corpore in lucem trahi.

PHRAORTES.

Nihil ista, Princeps, monstra, quod metuas,
 habent.

DARIUS.

Equidem, Phraorte: jamque lætitiæ impotens
 Animique, caros ibam in amplexus viri
 Cupidaque amantis colla prensabam manu:
 Cum nostra subito brachia clapsus, leves
 Ut umbra in auras, fumus aut tenuis, fugit.
 Hic rupit ægros anxius somnos dolor.
 Trepidumque misero pectus implevit metu.

PHRAORTES.

Et ista cur te visa sollicitum exedant?
 Illæsus oculos ante cum Daniel stetit,
 Lætum est salutis omen; haud certo magis
 Secunda poterant fata signari indice.
 Paulum opperire: protinus rerum abdita
 Pandentur; & te liberum curis dabunt.

DARIUS.

DARIUS.

Phraorte, propera; lucis apparet jubar;
 Ultraque clausum premere Danielem est nefas,
 Expecto reducem, quam libet, si nos ames,
 Moram amputabis.

PHRAORTES.

Quo jubes, ultro sequor,
 At ecce latos celerat Astyages gradus.

SCENA TERTIA.

DARIUS, DANIEL, ASTYAGES,
 JOSEDECUS, PHRAORTES.

ASTYAGES.

Gratulare Regnis, Genitor, & dignas Deo,
 Quem colere Daniel præcipit, grates
 habe

In omne tempus. En tibi incolumis redit:
 Medioque raptus mortis horrendæ sinu,
 Datamque præstat pariter & repetit fidem.

DARIUS.

Non ergo inani cecinit augurio Deus;
 Blandisve amantem falsus illudit dolis?
 Cum te per umbras noctis illæsum obtulit,

F.

Animo videndum ! nunc ades ; justos licet ,
 Quos tu movebas , ponere æternum metus :
 Ah ! patere , amico tandem ut amplexu fruar ;
 Cœloque carum pronus ut venerer caput !

DANIEL.

Quod vivo lethi victor & duras vices
 Elapsus , ad te sospes huc refero gradum ,
 Rex magne ; nostri munus hoc totum est Dei.
 Ille , ille sceleris ultor , & recti potens
 Fidusque custos , capite ab infante arcuit ,
 Et dira rabidis ora conclusit feris.

DARIUS.

Agnosco : neque me , spondeo , inmemorem
 dies

Videbit ullus :

DANIEL.

Ergo juratus fidem

Exsolve ; Deus hanc poscit.

DARIUS.

Exsolvam ; Deum hunc

Iterum iterumque testor , acceptam refers

Cui tu salutem : debitas pœnas luet

Cum Mithridate Gazabar. Raptum ocyus

Utrumque, mitti jubeo feralem in lacum.
Phraorte, tuus hic esto, quem decuit, labor.

DANIEL.

Ah ! parce, Princeps; non ego ultricem peto
Nec læsus ipse vel Deus dextram exigit.
Mansuescere ille docilis, & veniam bonus
Annueret, sceleris cum sui auctores piget.

DARIUS.

Abstiste : leges imperi infectum vetant
Quodcumque Regum jussa sancitum semel
Voluere : si quem legis immunem asperæ
Fieri decebat, merita tibi dudum incluta
Hoc vindicabant.

DANIEL.

Quid ais ?

ASTYAGES.

Expertum dabunt,
Quid nostra possint Numina : auxilium ferant
Impune quot quot jactitant nobis, Dei.

DARIUS.

Phraorte, jussa perage.

DANIEL.

Da potius, precor.

F ij

Ut vana Superum monstra, quos falso vetus
 Sacravit ætas, abnegent, tecum & colant
 Amentque, solus qui coli meruit Deus,
 Solus & amari meruit: absolvet reos
 Hac lege, veniam & sponte placatus dabit.

D A R I U S.

Frustra resistis, Numen ulciscar sine;
 Despecta cujus jura vindictam exigunt;
 Placabit iras fusus amborum cruor.

D A N I E L.

Placate, Princeps, ipse, placandum mihi
 Relinque Numen, quod scelus cumque arguis,
 Lacrymis piabo; lacrymæ exarmant Deum.

D A R I U S.

Vinctum huc utrumque pertrahe, & Proce-
 res mone
 Adeste Satrapas,

SCENA QUARTA

DARIUS, DANIEL, ASTYAGES,
JOSEDECUS.

DARIUS.

Quæ dedi, actutum exequar
Promissâ, Daniel; quem tuæ agnoscis Deum,
Colis & salutis vindicem; huic toto procul
Regno, fidele populus obsequium feret.
At nostra coram jussâ dum Satrapæ audiant,
Tu pauca placidis auribus dicta excipe.

DANIEL.

Quodcumque placeat, præcipe; imperium
sequor.

DARIUS.

Quod meruit ingens animus & tantis fides
Spectata monstros, nemo delatum decus
Tibi jam invidabit; quem tunc laudis gradum
Securum ab omni deinde te præstat metu.
Proin destinatos jam diu, & meritos cape
Titulos honoris; Satrapas reliquos super
Dominare; nostro quid quid imperio subest.

Uno minorem Rege te dominum sciat ;
Cultumque tanto muneri reddat parem.

DANIEL.

Parere potius liceat æternum , obsecro.
Procul & tumultu , placida sectantem otia ,
Fugientis ævi trahere relliquias breves.
Nimium ah ! ferendo , magne Rex, didici hæ-
tenus,

Quid odia possint ; lubrico quam stent loco ,
Regnantum habenas quot quot attrectant
manu.

Mea me pericla saltem , ut erudiant , sine ;
Doccantque miseras fugere , quas subii , vices.

DARIUS.

Dedisce tandem quos tibi fingis metus,
Cuicumque summi robur aspirat Dei;
Hominum tumultus spernere & tristes minas,
Vel si movebunt bella , tranquillus potest.
Frustra ergo refugis : hic Deus, per quem
salus

Recepta , cujus munere hanc lucem aspicias,
Tuam vicissim commodas , repetit manum ;
Et , quæ voluto cœpta , consiliis iuvæ.

DANIEL.

Consulere per te cuncta novisti satis ;
 Rex magne : neque te moneat ut quisquam ,
 indiges :

At nostra si fors opera , quod poscas , habet ;
 Certam probabis usque Danielis fidem.

DARIUS.

Te Nate , pariter iste spectabilis labor :
 Attende docilis pauca , quæ suadet Pater ;
 Altoque fige pectori , si quid sapiis.

ASTYAGES.

Crede obsequentem, Genitor, & quod vis jube.

DARIUS.

Quam tota Babylon , Nate, mox legem audiet,
 Suum unde vero Numini cultum astruam,
 Tuum est tueri deinde ; nec quidquam pati,
 Lex unde pereat , vel suus legi vigor.
 Quodcumque vitæ jam Patri restat , breve est.
 Ætas labore fracta & annorum gravi
 Onere fatiscens , Nate , me dudum admonet ,
 Instare propius lucis extremum diem.

ASTYAGES.

Quid loqueris ? Omen , Genitor , ingratum
 amove.

D A R I U S.

Tibi sceptrâ, Nate, quando contigerint, Deum
hunc

Hodierna cujus Numen asseruit dies,
Venerare; quamvis Satrapæ adversum fremant,
Et pertinaces patriis libent Deis;
Deus ille tibi sit potior; hunc cultu pio
Ubique populi vel reluctantes tremant.

A S T Y A G E S.

Confide, Genitor: Natus haud stimulis eget;
Exempla quem paterna sollicitant satis.

D A R I U S.

Te, Nate, Daniel melius erudit Patre.
Tibi sit parentis instar; hunc audi; hunc ama;
Huic cordis ultro pandere arcanos sinus
Ne pigeat unquam. Sana regnanti ingeret
Consilia: quid quid loquitur, hoc ipsum loqui
Cœlesti ab arce crede veracem Deum.

SCENA

SCENA QUINTA.

DARIUS, DANIEL, ASTYAGES,
PHRAORTES, JOSEDECUS.

DARIUS.
C Ur absque Satrapis hic ades?
PHRAORTES.

Pœnas dedit

Uterque dignas scelere.

DANIEL.

Quid loquitur?

DARIUS.

Dedit.

Uterque pœnas?

JOSEDECUS.

O Deus!

PHRAORTES,

Verum heu! nimis.

Rex magne!

DARIUS.

Nam quis facinus est ausus?

G

ASTYAGES.

Pater x

Facinoris, ille quisquis est, laudem feret.

DARIUS.

Phraorte, quo quo gesta sit tandem modo,
Rem pande totam.

PHRAORTES.

Densa dum populi manus

Facto obstupefcit: atque Danieli æquior,
Partæ salutis laudat auctorem Deum;
Rem Mithridates mente non placida tulit,
Fervens & ira Gazabar populum increpat,
Gravesque, si quid miffitent, addit minas.
Hic fremere plebs accensa, densari globus,
Factoque in ambos impetu immanem ad lacum
Pertrahere utrumque. Turbidus toto interim
Cælo resultat clamor, & trepidos ciet
Ab urbe cives. Satrapas frustra vocat
Hinc Mithridates; inde terribiles Deum
Intentat iras Gazabar: populus ferox
Nil audit: animos ipse nequidquam institi
Mollire, densamque, & manu & voce ad-
mopans,

Penetrare turbam: clamor hic unus sonat;
 Aureſque vox hæc una cunctorum ferit.
 Uterque pereat: patrii aut ſi quid Dei
 Poſſunt, amicam utrique jam præſtent opem.
 Nec plura: ab alto gurgite in præceps ruunt.
 Avidis cadentem faucibus prædam occupant
 Rabidi leones, nec pavimentum ſinunt
 Venire ad imum corpora; elatos vorant
 Artus per auras; nec prius ceſſat fames,
 Abſumpta donec fruſta membrorum, intima
 Condantur alvo.

JOSEDECUS.

Pœna conſequitur ſcelus!

PHRAORTES.

Animos repente tacitus invaſit ſtupor;
 Mox plauſus ingens oritur, atque unum polo
 Vulgi frementis turba, quod Daniel docet,
 Ineſſe clamat Numen.

DANIEL.

O lætam nimis,
 Ni fata luctu digna funeſcent diem!
 Pœnam nocentum quolibet credam bene
 Pretio redemptam!

G ij

ASTYAGES.

Nempe tam miseras preces,
 Hæc vota facias? Quam luunt, merito obtigit
 Utrique pœna hæc; ultor Astyages foret,
 Nisi occupasset ipse vindictam Deus.

PHRAORTES.

En Satraparum lecta procedit cohors.

SCENA ULTIMA.

DARIUS, DANIEL, ASTYAGES,
 PHRAORTES, JOSEDECUS,
 SATRAPARUM TURBA.

DARIUS.

A Deste, nostri grande præsidium Imperi,
 Dilecta, Satrapæ, capita; quis tandem polo
 Terrisque summus imperet rerum arbiter,
 Hodierna vidit pariter ac stupuit dies,
 Deus hic piorum tutor ac custos, lacu
 Daniele ab imo servat, hic idem impios
 Vindex. severus fraudis artifices premit.
 Ergo quis illo potior, aut cujus meo
 Vestroque Numen dignius cultu putem?

Audite , Proceres , vosque , terrarum ultimas ,
 Excipite vocem , quot quot habitatis plagas :
 Danielis unum novit ac metuit Deum ,
 Darius ; unum & tota , quam late patet ,
 Aſſyria metuat atque veneretur , jubet .
 Tuque ô , perenne cujus imperium eſt , Deus ;
 Utrumque mundi qui latus nutu moves ;
 Populi piumque Regis obſequium , precor ,
 Et in omne tempus recipe juratam fidem .

Finis Actus quinti & ultimi

MAG 2023559

